



მცხეთა - მთიანეთის  
საინფორმაციო  
ცენტრი



28.03.2013 13:38

- [მთავარი](#)
- [ახალი ამბები](#)
  - [პოლიტიკა](#)
  - [საზოგადოება](#)
  - [ადამიანის უფლებები](#)
  - [განათლება](#)
  - [ეკოლოგია](#)
  - [კულტურა](#)
  - [ეკონომიკა](#)
  - [ტექნოლოგიები](#)
  - [სპორტი](#)
- [სტატიები](#)
- [მულტიმედია](#)
- [კონფლიქტის ზონა](#)
- [მედია](#)
- [არქივი](#)
- [კონტაქტი](#)

[მთავარი](#) » [სტატიები](#) » კახა კალაძეს გარემოს დაცვის სამინისტროზე ზეწოლაში ადანაშაულებენ

# კახა კალაძეს გარემოს დაცვის სამინისტროზე ზეწოლაში ადანაშაულებენ

2013.03.27 | 13:59 წათია  
დანელიშვილი

[Like](#) Kety Gujaraidze and 142 others like this.

0

[Tweet](#) 1

[Share](#)



გარემოსდამცველები ენერგეტიკისა და ბუნებრივი რესურსების მინისტრს კახა კალაძეს გარემოს დაცვის სამინისტროზე ზეწოლაში ადანაშაულებენ. „მწვანე ალტერნატივას“ წარმომადგენლის ირაკლი მაჭარაშვილის განცხადებით, მინისტრი კალაძე და მისი მოადგილეები ხშირად აკეთებენ ისეთ განცხადებებს, რომელიც მათ კომპეტენციაში არ შედის და გარემოს დაცვის სამინისტროს უფლებამოსილებაში იჭრებიან.

გარემოს დაცვის სამინისტრომ, 20 მარტს, ხდის ხეობაში, „ყაზბეგი ჰესის“ მშენებლობასთან დაკავშირებით [უარყოფითი ეკოლოგიური ექსპერტიზის დასკვნა გასცა](#). „ხდის ხეობა ჯიხვების მნიშვნელოვანი თავშესაფარია და მათი რიცხოვნობა საკმაოდ დაბალია. დაგეგმილი საქმიანობის განხორციელება მოიცავს ბურღვა – აფეთქებით სამუშაოებს და სამშენებლო ხმაურს. დეტალურად არ არის შესწავლილი საპროექტო ზონაში, იქტიოფაუნის, ფლორის და ფაუნის შესახებ ინფორმაცია, განსაკუთრებით კი წითელ ნუსხაში შეტანილი სახეობები“, – აღნიშნულია სამინისტროს დასკვნაში. აქამდე, გარემოს დაცვის სამინისტრო ყველა ჰესის მშენებლობის პროექტზე დადებით დასკვნებს გასცემდა.

უარყოფითი ეკოლოგიური დასკვნის გასაჯაროებიდან მესამე დღეს ენერგეტიკისა და ბუნებრივი რესურსების მინისტრი კახა კალაძე, ჰესების მშენებელი კომპანიის, შპს „ფერის“ მიწვევით ყაზბეგში ავიდა და დარილიჰესის და ლარსიჰესის მშენებლობა დაათვალიერა.

„გარემოს დაცვის სამინისტრომ უარყოფითი შეფასება მისცა „ყაზბეგი ჰესის“ გარემოზე ზემოქმედების შეფასების დოკუმენტს, რომელიც ინვესტორმა წარმოადგინა. არსებობს შენიშვნები, ინვესტორი გაითვალისწინებს ალბათ ამ შენიშვნებს, მომავალში ისევ შეიტანს შესწორებული შენიშვნებით ამ დოკუმენტს გარემოს დაცვის სამინისტროში და დარწმუნებული ვარ, მიიღებს მშენებლობის ნებართვას,“ – განაცხადა ენერგეტიკის მინისტრმა კახა კალაძემ.

„ყაზბეგი ჰესთან“ დაკავშირებით გარემოს დაცვის სამინისტროს მიერ მიღებულ გადაწყვეტილებაზე კომენტარი კომპანია „ფერის“ ხელმძღვანელმა ლაშა იორდანიშვილმაც

გაკეთა. მისი თქმით, ხდის ხეობაში ჰესის მშენებლობაზე ნებართვის მიღების მიზნით, კომპანია გარემოს დაცვის სამინისტროში ახალი დოკუმენტის წარდგენას აპირებს. „ვაპირებთ ახალი დოკუმენტის შექმნას, რადგან მემორანდუმით აღებული და ნაკისრი გვაქვს ვალდებულებები სახელმწიფოსთან ჰიდროელექტროსადგურის დასრულებაზე. უკვე დახარჯულია საკმაო რაოდენობის თანხები. მოსამზადებელი სამუშაოები საკმაოდ კარგად არის შესრულებული. იმედი მაქვს, მოკლე ხანში შევძლებთ ამ შენიშვნების აღმოფხვრას,“ - აღნიშნა ლაშა იორდანიშვილმა.

გარემოსდაცვითი არასამთავრობო ორგანიზაციების წარმომადგენლები ენერგეტიკის მინისტრის განცხადებას, გარემოს დაცვის სამინისტროზე ზეწოლად აფასებენ. „მწვანე ალტერნატივას“ წარმომადგენლის ირაკლი მაჭარაშვილის თქმით, ზეწოლა რომ არა, სხვა შემთხვევაში, შეუძლებელია ენერგეტიკის მინისტრი „დარწმუნებული იყოს“, მომავალში გარემოს დაცვის სამინისტრო დადებითი ეკოლოგიური ექსპერტიზის დასკვნას გასცემს თუ არა.

„ეს არის ზეწოლა და ეს არამარტო ამ განცხადებიდან ჩანს. ჩვენ არაერთი განცხადება გვინახავს როგორც კალაძის, ისე მისი მოადგილეების მხრიდან, სადაც ისინი იმ საკითხებზე საუბრობენ, რომელიც მათ კომპეტენციაში არ შედის, სხვა სამინისტროს უფლებამოსილებაში იჭრებიან. მაგალითად, საჯაროდ აკეთებდნენ განცხადებებს, რომ ისეთი არაფერი შენიშვნა არ არსებობდა, რომლის საფუძველზეც შეიძლებოდა არ გაცემულიყო ჰესზე ნებართვა და ჯობდა მალე გაეცათ. ნორმალურ ქვეყანაში წინასწარ არავინ იცის ესა თუ ისე პროექტი შედგება თუ არა. ეს წყდება მხოლოდ გარემოზე ზემოქმედების შეფასების პროცესში. ამ დროს ხდება სოციალური, ეკონომიკური, ეკოლოგიური და სხვა ფაქტორების შედარება, პლიუსების და მინუსების დათვლა. სამწუხაროდ, საქართველოში არც ბევრ ინვესტორს ესმის მისი არსი და არც ხელისუფლების ზოგიერთ წარმომადგენელს, რადაც ახირება ჰგონიათ“, - განუცხადა მცხეთა – მთიანეთის საინფორმაციო ცენტრს ირაკლი მაჭარაშვილმა.

მისივე თქმით, ჰესების მშენებლობასთან მიმართებაში სახელმწიფოს პოლიტიკა იგივე დარჩა და ენერგეტიკის სამინისტროს არ უნდა ჰესის მშენებლობაზე უარის თქმის ერთი პრეცედენტი მაინც დაუშვას.

„ჯერ არაფერი არ იცვლება ამ ქვეყანაში, როგორც წინა ხელისუფლების დროს იყო ისევეა. ჯერ აცხადებდნენ, რომ ეს პროექტი გაკეთდება და მერე იწყებდნენ იმის დათვლას რა და როგორ მოხდებოდა. გუშ ანგარიშის გარეშე ხდებოდა ყველაფერი და უკვე მიღებული გადაწყვეტილებების „გაპრაღება“. არ ჰესზე უარის თქმისუნდათ, ერთი პრეცედენტი მაინც დაუშვან. არ მესმის, რატომ არის ატეხილი ერთი ამბავი ამ პატარა ჰესის მშენებლობაზე? რა პრინციპული მნიშვნელობა აქვს ენერგეტიკული ან სხვა თვალსაზრისით 6 მეგავატიანი ჰესის მშენებლობას, რომელიც წყალმცირობის დროს, ალბათ 2 მეგავატს თუ აიღებს. როცა ასეთი პროექტია, რომელიც თავისი გარემოსდაცვითი მნიშვნელობით ბევრად აღემატება ენერგეტიკულ მნიშვნელობას და ამის დათმობასაც არ აპირებენ, წარმომიდგენია რა მოხდება დიდ ჰესებზე. როცა მთავრობა იძახის, რომ გარემოს დაცვა მათი პრიორიტეტი იქნება, ეს ნიშნავს, რომ ზოგი პროექტი გამოვა, ზოგი არა. ენერგეტიკის სამინისტრო ვერ ხსნის, რატომ უნდა აშენდეს ეს ჰესი. ზოგადი ფრაზები მოაქვთ რომ ენერგეტიკა უნდა განვითარდეს. იმ ერთიბეწო ჰესზე თუ არის

დამოკიდებული ქვეყნის ენერგოდამოუკიდებლობა და რუსეთისგან თავის დახსნა, კი ბატონო,“ - ამბობს ირაკლი მაჭარაშვილი.

არასამთავრობო ორგანიზაცია „სტეფანწმინდას“ წარმომადგენლის შოთა ბუჩუკურის თქმით, ენერგეტიკის მინისტრი არც მალავს, რომ ხდის ხეობაში ჰესის აშენება ძალიან უნდა. მისი თქმით, ამას კალაძის განცხადებაც ადასტურებს, რომ ენერგეტიკის სამინისტრო „ყაზბეგი ჰესის“ მშენებელი კომპანიისთვის ჰესის ჩაბარების ვადის გახანგრძლივებას აპირებს.

„ენერგეტიკის მინისტრმა ორი დღის წინ ისიც თქვა, რომ ენერგეტიკის სამინისტრო კომპანიას ვადას გაუხანგრძლივებს იმისთვის, რომ თავიდან შეიტანოს გზშ და პროექტის განსახორციელებლად ვადაში ჩაეტოსო. რა მემორანდუმიც იყო დადებული „ყაზბეგი ჰესზე“, იმ მემორანდუმით, კომპანიას ჰესი 16 აგვისტომდე უნდა აეშენებინა. ახლა, რათქმაუნდა, ნებართვაც რომ მიიღოს, ამ დროში ვერ ჩაეტევა. რა აუცილებლობას ხედავს ენერგეტიკის სამინისტრო ამ ჰესის აშენებაში და ამისთვის დროის გახანგრძლივებაში, ვერ ვხვდები. ენერგეტიკის სამინისტრო არ არის ვალდებული ვადა გაუხანგრძლივოს“, - აღნიშნავს შოთა ბუჩუკური და იქვე დასძენს, რომ ენერგეტიკის მინისტრი, გარემოს დაცვის მინისტრისგან განსხვავებით, ჰესის მშენებლობასთან დაკავშირებით ადგილობრივი მოსახლეობის აზრით არც დაინტერესებულა: „წინა მთავრობას ჰქონდა ეს პრობლემა, რომ ხალხის აზრს ყურს არ უგდებდნენ. გარემოს დაცვის მინისტრი რომ ჩავიდა ყაზბეგში, ჰესებიც ნახა და ხალხის აზრიც მოისმინა. ახლა, ენერგეტიკის მინისტრი ისე ჩავიდა ყაზბეგში და წამოვიდა, რომ ერთ ადგილობრივს არ შეხვედრია და აზრი არ უკითხავს. მხოლოდ ინვესტორს მოუსმინა. ინვესტორს ალბათ სამინისტროშიც ყოველ დღე ხვდებიან და უმჯობესი იქნებოდა ადგილობრივების აზრი მოესმინა,“ - ამბობს შოთა ბუჩუკური.

გარემოს დაცვის მინისტრი ხათუნა გოგალაძე, მოადგილესთან და სამინისტროს წარმომადგენლებთან ერთად ყაზბეგში მშენებარე „დარიალი ჰესის“, „ლარსი ჰესის“ და დაგეგმილი „ყაზბეგი ჰესის“ დასათვალიერებლად დაახლოებით სამი კვირის წინ იმყოფებოდა. მინისტრთან შეხვედრაზე მოხვედრებმა დარიალის და ხდის ხეობებში ჰესების მშენებლობა გააპროტესტეს. მინისტრის მოადგილემ ნინო შარაშიძემ საუბარში ჰესების მშენებელი კომპანია „ფერის“ ხელმძღვანელს ლაშა იორდანიშვილს უთხრა, რომ მის თანამშრომლებს არ უნდა ურეკავდეს და ზეწოლას არ უნდა ახდენდეს. მინისტრის მოადგილემ ამ განცხადებაზე კომენტარი აღარ გააკეთა.

ცნობილია, რომ ყაზბეგში, დარიალის ხეობაში ამ დროისთვის ორი ჰესი შენდება, „დარიალი ჰესი“ და „ლარსი ჰესი“. კიდევ ერთი ჰიდროელექტროსადგურის „ყაზბეგი ჰესის“ მშენებლობა კი ხდის ხეობაში მდინარე ბროლისწყალზეა დაგეგმილი. გარემოსდამცველები აღნიშნული ჰესების მშენებლობას აპროტესტებენ და აცხადებენ, რომ ეს ყაზბეგის უნიკლურ ფლორასა და ფაუნაზე უაყოფითად იმოქმედებს და შესაძლოა, იშვიათი პოპულაციების გაქრობაც გამოიწვიოს.

ამ თემაზე:

[ვინ ემხრობა და ვინ აპროტესტებს ხდის ხეობაში „ყაზბეგი ჰესის“ მშენებლობას](#)

[რეპორტაჟი ყაზბეგიდან – მოხვევების პროტესტი](#)

[შოთა ბუჩუკური – „პრემიერმა პირად კონტროლზე აიყვანოს ყაზბეგში ჰესების მშენებლობის საკითხი“](#)

[ბესარიონ ტატიშვილი – ევროპაში მიღებიდან წყლის ზემოთ ამოყვანა ხდება, აქ თერგს ასაფლავებენ](#)

[ივანე ჯაფარიძე – რაღა თერგი ან ხდისწყალი უნდა დასამარდეს მაინცდამაინც?](#)

[შოთა მირიანაშვილი - ყველაფერი არ უნდა იყიდებოდეს!](#)

[10 ჰესი ყაზბეგში – „თუ არ აშენდება, 90-იანი წლების სიბნელე დაბრუნდება“, – მინისტრის მრჩეველი](#)

[ხდის ხეობას საფრთხე ემუქრება](#)

Like Kety Gujaraidze and 142 others like this.

0

Tweet 1

Share